

## ТАВДУГААР БҮЛЭГ

### **ГАМШИГ, ОСЛЫН ХОР УРШГИЙГ АРИЛГАХ, СЭРГЭЭН БОСГОХ БОЛОН ЭРЭН ХАЙХ, АВРАХ АЖИЛЛАГААНД ОРОЛЦУУЛАХ**

98. Байгалийн болон нийтийг гамшгийн аюулын үед аврах ажиллагаа явуулах, гамшигт нэрвэгдсэн ард, иргэдэд тусламж үзүүлэхэд Монгол Улсын Ерөнхийлөгч, Зэвсэгт хүчний Ерөнхий командлагчийн шийдвэрийг үндэслэн цэргийн анги, салбарыг ЗХЖШ /ХХЕГ, ОБЕГ/-ын даргын, ДЦ-ийн командлагчийн тушаалаар татан оролцуулна. Энэ талаар зөвшөөрөл авах бололцоогүй онцгой тохиолдолд цэргийн ангийг хүрээний даргын шийдвэрээр гарган ажиллуулж, ЗХЖШ /ХХЕГ, ОБЕГ/-ын дарга, ДЦ-ийн командлагчид илтгэнэ.

99. Гамшгийн аюулын үед хүн, мал, амьтан, эд хөрөнгө, түүх, соёлын дурсгалт зүйлийг эрж хайх, аврах, гал түймрийн шаталтыг зогсоох, унтраах, нэрвэгдэгсдэд анхны тусламж үзүүлэх, гамшгийн голомтоос гаргах, хор уршгийг арилгах үйл ажиллагаанд туслахаар томилогдсон ангид хүрээний дарга үүрэг өгч, хэний мэдэлд ажиллах, хавсарган өгсөн техник, эд хэрэгсэл, үүрэг биелүүлэх хугацаа, хувцас, тээврийн хэрэгсэл, хангалт, хөдөлмөрийн аюулгүй байдлыг хэрхэн сахих журмыг тодорхой зааж өгнө.

100. Заасан газарт очмогц томилогдсон анги, салбарын захирагч нь удирдаж буй хүнд яаралтай илтгэж, түүний заавраар ажиллана. Гал түймэр, гэнэтийн аюул гарсан газар очиход удирдаж буй хүн ирээгүй байвал анги, салбарын захирагч нутгийн захиргааны байгууллага, тэндээс томилсон хүч, бүрэлдэхүүнтэй ажлаа зохицуулан бие даан үүрэг гүйцэтгэнэ.

Цэргийн ангийн захирагч өгсөн үүргийн явц болон түүнийг биелүүлсэн тухай хүрээний болон шууд захирах даргад илтгэнэ.

101. Байгалийн болон нийтийг хамарсан гамшгийн аюулын үед аврах ажиллагаа явуулахаар томилогдсон анги, салбарын захирагчийн тушаалаар эд хөрөнгийг хамгаалуулахаар түр харуул томилно. Эдгээр харуул нь томилон гаргасан анги, салбарын захирагч, хүрээний дарга, цэргийн зохицуулагч болон ангийн жижүүрт захирагдан энэ дүрмийн дагуу үүрэг гүйцэтгэнэ.

102. Нутгийн захиргааны байгууллагын холбогдох албан тушаалтанд цэргийн анги, салбар буюу багийг захируулахыг хориглоно.

Гамшгийн аюулаас хүн ам, мал, амьтан, эд хөрөнгө, хүрээлэн байгаа орчныг урьдчилан сэргийлэх, аврах, хор уршгийг арилгах, хойшлуулшгүй сэргээн босгох ажил хийлгэх зорилгоор онцгой байдлын байгууллагын мэдэлд түр хугацаагаар шилжүүлэн захируулж болно./Гамшгаас хамгаалах тухай хуулийн 22.1 дэх заалт/